

RelatoDiaNacional –Nos amor pa Aruba tur dia

Skirbi pa Ruthy “Lady Ruth” Vrieswijk-Bergen

ORANJESTAD - E celebracionnan di nos dia nacional tabata hopi dushi, yen di color, musica, alegria y amistad. E aña aki si mi a rek mi paranda, anto no na pia, manera e dushi cancion di nos cantante Edjean den su bunita cancion “paranda na pia”, no, mi a prefera di bay cu mi casa den su auto pa e stuur, pa ami por wak tur rond, scucha radio cu dushi musica. Relaha! Despues di a marcha den mi grupo scout Kimball O’Hara hunto cu e gruponan scout miembro di Scouting Aruba, bao e dinamico HC Elson Barry, nos grupo di Kimball a para den un Erehaag na e entrada di Cas di Cultura, pa a ricibi nos tata di cultura Sr. Juan Chabaya Lampe, conoci pa nos tur como “Padu” ora el a yega Cas di Cultura pa e apertura di un bunita exposicion na su honor. Tabata un dushi trai merdia yena di musica e.o. di nos amigo pianista di nos hermana isla Corsow Sr. Norman Moron. Potretnan, reseñanan, cortenan

di corant y poemanan a dorna e foyer di Cas di Cultura y mas paden banda di e bar, por a admira e exposicion mes. E artista talentoso Stan Kuiperi a guia Padu y a cuminsa duna e dignitarionan hunto cu Padu un splicacion di cada cuadro, pero despues Padu a bay sinta pa e no cansa di mas. Nos di dos stop tabata na Fort Zoutman na unda tabata reina dushi ambiente cu musica tipico crioyo, e.o. di e grupo “Sodo y cuero” y e cantante di curazon Jose David den un programa bunita guia pa e simpatico Goriaka Maal di Corsow como maestra di ceremonia, pero cu curazon angra aki na Aruba. Nos ta keda den un union di amistad bunita cu nos islanan ABC. Pafor tabatin un careda di tent cu dushi boca dushinan y of obranan di man, bon surti pa nos artistanan local cu nan amor grandi pa Aruba. Mi a cumpra algun conserba di cashupete y pa mi sorpresa e artista cu su sonrisa hopi suave, Regina Tromp, a bisami



di sorpresa: “Tuma esaki como un regalo pa bo!” Di mi curazon mi a gradici y acepta e bunita baret di colornan di regenboog, mes suave cu su dushi sonrisa cu a sali for di su humilde curazon ilumina cu hopi amor. Mi ta kere mi a toca su curazon tambe cu e bunita poema cu mi a recita y dedica na Padu, eynan na Fort Zoutman, locual mi a desea di hasi tambe na Cas di Cultura, pero e programa tabata hopi yen caba. Nos a laga Fort Zoutman cu rumbo pa e Cas di e partido AVP, pasobra mi tambe kier a admira e auto solar naturalmente. Mi a lubida hasta e nomber, ta siña ta yame? Auto solar? Un banda musical hopi, pero hopi alegre y contagioso tabata tocando yen di smak! Loco pa los e pianan y e heupnan un tiki, pero a prefera di sigui combersa cu algun amiga cu

mi a topa. Pero ora nos a sali djey y a yega na e club Aruba Jrs. Nos a los e pianan riba e ritmo cayente y potente di e artista cantante guitarista cu ta sinti e emocion di pueblo, cu sa, cua cancion of melodia ta cai bon, Etty Toppenberg. Hopi cara conoci di mi dushi bario Dakota tur dia, di bishita na Aruba Jrs, manera bon bisiña! Mi casa Johan y ami a come un dushi plato di pisca cu pan bati di maishi rabo, su banana hasa, su sous cu un crenchi ciboyo, hopi dushi mes!! Mi amiga Mena Odor-Croes cu a forma parti di e kokinan inspira a wordo “portretisa” mes ora, como un bunita recuerdo di nan trabao duro e atardi nohecer ey. Nos no a keda ora un di mi amigonan y coleganan di trabao na hotel antes, Segundino Tromp nan banda a cuminsa set up pa sigui, despues di e marathon musical

di nos amigo Etty. Te ainda mi ta mira e cara di un otro bon amigo, Amado Rosina, di Dakota tur dia, mi dilanti. Su sonrisa ta ponebo lubida con cansa bo ta, ta manera un alegria cu ta sigui inspira. Para hunto cu mi rumannan homber Roy y Lucky, mi casa Johan y ami a combersa un rato cu algun otro hende y djey si nos a sali cu rumbo bek pa cas. Hopi satisfecho, hopi contento, di a sinti e union y amistad cu a reina e dushi dia nacional aki, dia 18 di maart 2009. Pabien na tur cu a duna, traha, comparti y celebra nos dia nacional cu asina hopi amor! E amor grandi aki mes por sigui inspira nos tur, pa sigui stima y aprecia nos dushi isla den laman! Pa nos aporta na algo bon pe, tur dia, segun nos mesun amabilidad, cordialidad y capacidad. Cu Dios bendiciona cada famia na Aruba tur dia!

